

山西通志卷第二百一

山西巡撫都察院右副都御史臣覺羅石麟

曾修輯

藝文

北齊

韓陵山碑記

溫子昇

昔晉文尊周蹟宣于踐土齊桓伯世威著于召陵蓋道冠諸
侯勲高天下衣裳會同之所兵車交合之處寂寞消沉荒涼
磨滅立談者空知其名遭遇者不識其地然則樹銅表跡刊
石紀功有道存焉可不尚歟永安之季數鍾百六天災流行
人倫交喪爾朱氏旣絕彼天綱斷茲地紐祿去王室政出私
門銅馬競馳金虎亂噬九嬰暴起十日並出破壁殞珪人物

既盡頭會箕斂杼柚其空大丞相渤海王命世作宰唯幾成
務標格千仞巖崖萬里運鼎阿于襟抱納山岳于胸懷擁元
雲以上騰負青天而高引鐘鼓嘈囀上聞于天旌旗繽紛下
蟠于地壯士凜以爭先義夫憤而競起兵接仞于斯場車錯
轂于此地轟轟隱隱若轉石之墜高崖硲硲磕磕如激水之
投深谷俄而霧捲雲除冰離葉散靡旗蔽日亂轍滿野楚師
之敗于栢舉新兵之退自昆陽以此方之未可同日既考茲
沃壤建此精廬砥石礪金瑩珠琢玉經始等于佛功制作同
于造化息心是歸淨行攸處神異畢臻靈仙悉萃鳴玉鸞以
來遊帶霓裳而至止翔鳳紛以相歡飛龍宛而俱躍雖復高
天銷于猛炭大地淪于積水固已傳之不朽終亦記此無事

段干木廟記

盧士牟

廣之芮東有祠署于道曰魏文侯師段干木廟謹按史傳語
文侯過其廬必式呂覽云秦攻芮司馬康以先生深諫其君
又按圖經云先生以原上草廬中高枕而臥秦遂解兵昔子
貢救魯挾辯詐扶危主然後僅而獲免豈若先生靡勞師徒
曠然宴息而國不加害民受其賜誠以德充氣融道義純備
者矣貞觀元年秋八月七日將仕郎前守河南府伊陽縣主
簿范陽盧士牟載想遐蹤願誌遺廟銘曰鼎湖在南中條在
北洪河橫流以紀魏國天地淑靈山澤粹精惟公克生爲魏
之楨鄰不加兵民用舒寧秦號虎狼殺厲重傷毒螫斷斷侵
軼西疆瞻我仁人沛然知方以義以暴以柔以剛善師不陣
古稱至德先生宴然婆娑偃息蓬居草廬是敬是式比彼干

戈俄成禮則士之生世人爵爲貴功成不居惟德之懿士之
避土或蹈遐裔公則靖民以義爲利我行其野祠宇巍然播
詠仁風精神若傳條山如礪河水如帶先生之德永永不寐

風后八陣圖記

獨孤及

物不終靜必授之以動當純坤用事陰疑於陽則飛龍戰太
樓以散聖盜金起故戎馬生乃有并吞八荒爭截九有大者
天柱折地維絕小者作慝廬山負阻中冀上帝憑怒下土是
恤乃眷武德黃帝受之始順殺氣以作兵法文昌以命將於
是乎征不服討不庭其誰佐命曰元老風后蓋戎行之不修
則師律用爽陰謀之不足則凶器何恃故天命聖者以光戰
術俾懸衡於未然察變於倚數握機制勝作爲陣圖夫八宮
之位正則數不愆神不憾故八其陣所以定位也衡抗於外

軸布於內風雲負其四維所以備物也虎張翼以進蛇向敵而蟠飛龍翔鳥上下其勢所以致用也至若疑兵以固其餘地遊軍以按其後列門具將發然後合戰弛張則二廣迭舉犄角則四奇皆出必使陷堅陣拔深壘若星馳天旋雷動山破彼魏之鶴列鄭之魚麗周武之熊羆昆陽之虎豹出匪以律我異於是旣而圖成罇俎帝用經畧北逐獯鬻南平蚩尤戡黎於版泉省方於崆峒底定萬國旁羅七曜鼎成龍至去而上僊於是遺風冥冥時亡而圖存焉嗚呼聖迹長往神機未昧酌其流者猶足以決勝三軍禦侮萬里故項籍得之以霸西楚黥布得之奄有九江漢孝武得之攘匈奴服甌越東收獫狁西拓大夏然則聖圖幽贊未始有涯唐天寶中客有爲韜鈴者得其遺制於黃帝書之外篇裂素而圖之則勝敗

之朕在我股掌天地之心見於毫末議欲獻諸策府用廣武
事會天子以不戰爲師無爲爲寶則是圖也興於多難廢於
昇平湮淪不書盛德其沒乃旌諸圖側以爲三皇之故事六
藝之餘技云

汾河義橋記

崔祐甫

絳人有成橋於稷山縣南汾河水上入境稱曰孝子詢之三
十喪父母五十猶衰麻故其鄉黨捨氏不名貴之也初茲縣
有具舟之役鄰邑有官修之梁自太原西河上黨平陽至於
絳州達於雍繇卒迫程賈人射利濟舟爲捷渡口如肆孝子
川上喟然歎曰夫來者如斯其可勝記欲速不達式在茲乎
見義不爲非勇也臨難不濟非義也迺願棄家乞諸他郡枯
槁藍縷日恒歲積自阿闕而東陶唐儉風食貨艱難閭里褊

小率令遠驟馳邇饋飴者盡隄美於編戶丁男捨耒而攻木
聲感也汾流湯湯河潏牽射隤沙徙岸呀呬轉騰畚築於
激射之旁根柱於沸涌之下是慮是圖功就其十八九矣其
年秋七月天作淫雨湍悍襄陵噫大水不仁前功蕩矣邑老
鄉人涕泗弔之日力竭于子天不恤是而已矣顧而不應且
有後圖徵詩人之嘉謀參作者之遠慮曳索解縶繫舟戾航
白露下而謀始止於凌澌杜春水解而興功止於水潦降一
歎不可奪志三年其有成功廣可方軌平可轉轂去其飾成
無丹獲取其固勢異虹霓僉義於孝子之功也故曰義橋昔
周王以懿戚封建吳札美盛德遺人西臨孟津北對姑射山
河風土其肯徒然所以義表顓門功烈隣境難其一善矧乃
兼之由是縣人志之于石

寶應靈慶池神廟記

張濯

天有五星辰居其一地有五材水爲之首旣作鹹以正味亦凝質而成鹽則橫目之人生齒之歲罔不資焉而後食矣鹽之爲用大矣哉寶應靈慶池者山海經所謂鹽販之澤也俗稱官號皆曰鹽池供華夏二十餘州宅黃河千里之曲北抱原勢南負山陰涵濡泓澄浸漬瀉鹵外無寸草內絕纖鱗水或紫赤鹽皆潔白有自來矣頃大歷丁巳秋雨成災凡厥井疆漫爲塗潦今京東和糴使兼知河東租庸鹽鐵侍御史清河崔公陞時以監察權領是邦憂國恤人籲天有禱乃徵畚鍤集役徒修堤防導溪澗積溜鴻湧白波如山西遶北涯散於沒女監斯池町畦不沒廬室獲全繫公是賴矣粵翌日亦旣開霽紅鹽自生盈掬傾筐或璽或栗形攢伏虎色澈丹砂

靈貺休徵古未之有公乃獻狀於戶部侍郎韓公滉韓公伏
奏於代宗代宗俾諫議大夫蔣鎮覆之則編於史冊薦於郊
廟矣與夫白麟赤雁之應野蠶稽穀之祥何以異乎冬十月
詔錫池名曰寶應靈慶兼置祠焉蓋國家祈豐財旌瑞貺也
其明年因厥農隙創茲神寢卜津涯六十里之半當安解二
大邑之間挾陝陝掾橐橐工惟力競役若子來俄結構以時
起儼塗墍而斯畢然後審像設煥丹青睟容穆如甲士勗屬
則聰明正直之有憑也夫其洞戶南豁滄波森然樹以修槐
羅以香草則風涼會舞之有所也又來歲己未夏五月九日
天子降中貴人以牲牢祀之制祀光臨衣冠列位秩齊四瀆
禮視三公亦爲盛矣其後西自關輔東踰崤澠南馳陝服北
走絳臺馬屯雲車流水乞靈報德可勝紀乎易曰聖人以神

道設教而天下服此之謂也遂遷公殿中侍御史京東和糴使逮于斯任豈惟執憲簡頒鹽政必將秉造化應鼎之和羹人皆望焉神所勞矣濯客自東鄙觀藝而來美精誠之動天多築護之盡力輒採聞見題於樂石庶丕績不朽與池始終時建中二年秋八月記

移丹河記

武少儀

高平古茲氏邑也其沿代改名圖經詳矣初相地而居之蓋以土厚水深爲善農鑿井而飲者則以穿壤剖石爲艱故千家之中數井而已綆以遠引而多絕瓶以難升而驟贏則雖有端賜之機智無施其巧捷雖有管寧之仁惠無杜其忿鬪况牛馬俟乎滿腹必遵千里之河而瓜蔬期乎給口常望一旬之雨朝夕勞苦歲時饑饉僅可勝道哉嘻凡爲前弊滋久

後賢乃革不然者豈子男百輩而莫之是恤貞元七年潞
州屯留令平原明濟受連帥相國大司空義陽王李公之命
領茲邑撫安疲黎其清勤簡惠不異乎屯留之政政可知
也下車之日咨訪故老問人疾苦僉曰公之至也俗詠其蘇
矣惟水之歉詎敢求救於公耶明侯聞之若疚於心且形於
色曰夫窮必有泰固常理也此豈無望前或未思吾將退而
慮之由是發智周之妙躬循郊原目究川谷度高下之勢相
引決之宜有丹水者始自縣之西北山源高而派平可議壅
以導明侯載審厥事將利於人乃下謀於鄉耆次白於郡守
上言於節制才獲所請爰賦其功乘井稅之暇俟農桑之隙
先儲乎薪芻之物次具乎畚鍤之器然後量工命日使里人
舉助競子來而展力故不更素宛其有成始瀦流而爲潭因

疏渠以遶廓築防以補其陷隙剝木以導其險阻脉分枝散貫邑周閭瀾瀾苔草之間陰陰槐柳之下遂使家開沼沚戶植菱荷濫觴可以寄傲垂釣可以烹鮮豈直豐畦圃之沃灌恣閭閻之飲濯路有奉漿之義井爲應急之泉人無荷擔之勞畜無奔走之困而已也復於潭側特建水祠列樹敞亭別成佳境將俾水依神而永久人賴水而無極庶功用不再且祈報有歸焉明侯覩夫衆情之欣洽足以閒居而賞玩化舄之餘閱王鳧之雙飛臨堂之際調宓琴而合響不甚美乎君子曰政無大小以勤民爲良事無工拙以利物爲貴如明侯者實兼而有之其由我大司空義陽王以至公且明推獎而致此者矣余偶以行役經過於斯耳聆嘉謠目覽異績緇黃蓄艾因請余以紀事余誠忝跡於文者姑具述義陽王之德

舉明侯之善亦何辭焉是則勉而志之

道州毀鼻亭神記

柳宗元

鼻亭神象祠也不知何自始立因而不除完而恒新相傳且千歲元和九年河東薛公由刑部郎中刺道州除穢革邪敷和于下州之罷人去亂卽治變呻爲謠若痿而起若矇而瞭騰踴相視謹愛克順旣底于理公乃考民風披地圖得是祠駭曰象之道以爲子則傲以爲弟則賊君有鼻而天子之吏實理以惡德而專世祀殆非化吾人之意哉命亟去之於是撤其屋墟其地沉其主於江公又懼楚俗之尚鬼而難諭也乃徧告于人曰吾聞鬼神不歆非類又曰淫祀無福凡天子命刺史于下非以專土疆督貨賄而已也蓋將教孝弟去奇邪俾斯人敦忠睦友祇肅信讓以順於道吾之斥是祠也以

明教也苟離于正雖千載之遠吾得而更之况今茲乎苟有
不善雖異代之鬼吾得而攘之况斯人乎州民旣諭相與歌
曰我有考老公燠其肌我有病瘥公起其羸髫童之囂公實
智之鰥孤孔艱公實遂之孰尊惡德遠矣自古孰羨淫昏俾
我斯瞽千歲之冥公闢其戶我子洎孫延世有慕宗元時謫
永州邇公之邦聞其歌詩以爲古道罕用賴公而存斥一祠
而二教興焉明罰行于鬼神愷悌達于蠻夷不惟禁淫祀黜
非類而已願爲記以刻山石俾知教之首

絳守居園池記

樊宗師

絳卽東雍爲守理所稟參實沈分氣蓄兩河潤有陶唐冀遺
風餘思晉韓魏之相剝剖世說總其土田士人令無磽雜擾
宜得地形勝瀉水施灋豈新田又叢猥不可居州地或自有

唐興人因得附爲奢儉將爲守悅致平理與益侈心耗物
時與自將失敦窮華終披夷不可知卑緬孤顛跼元武踞
守居割有北自甲辛苞大池泓橫硤旁潭中癸次木腔瀑三
丈餘涎玉沫珠子午梁貫亭曰洄漣虹蜺雄雌穹鞠覲廡礙
偃島坻淹淹委委莎靡縵蘿蕃翠蔓紅刺相拂綴南連軒井
陣中踴曰香承守寢晬思西南有門曰虎豹左畫虎搏立萬
力千氣底發彘匿地努肩腦口牙快抗電火雷風黑山震將
合右胡人鬚黃髭纍珠丹碧錦襖身刀囊鞞撾緇白豹元斑
飫距掌胛意相得東南有亭曰新前舍曰槐負護霽鬱蔭後
頤渠決決緣池西直南折廡赴可宴可衙又東騫渠曰望月
又東騫窮角池研雲曰栢有栢蒼青宮士擁列與槐朋友巉
陰洽色北俯渠憧憧來刮級面西巽隅間黃原垓天汾水鈞

帶白言謁行旦良閒遠岡青紫近樓台井閭點畫察可四時
合奇士觀雲風霜露雨雪所爲發生收斂賦歌詩正東曰蒼
塘蹲瀕西潏望瑤翻碧激光文切鏤梨深撓撓收窮正北曰
風隄乘攜左右隄執北廻股努帶楸蹴墉御渠歆池南楯楹
景怪燭蛟龍鈎牽寶龜靈廬文文章章陰欽墊飈煙潰雷聚
桃李蘭蕙神君仙人衣裳雅冶可會脫赤熱西北曰鼇蛭原
開哈儲虛明茫茫崑眼湏耳可大客旅鐘鼓樂提鷗挈鷺偈
池豪渠憎乖憐圍正西曰白濱蒼深憐梨素女雪舞白侑水
翠披聊聊千幅迎西引東上長崖挾橫埒日卯西樵途塢徑
山委蟲鳥聲無人風日燈火之晝夜漏刻詭婉絢化大小亭
餽池渠間走池隄上亭後前陴乘墉如連山羣峰擁地高下

中原點是浴壑水川古自原三十里鑿高槽絕竇墉爲池溝